

## Suliffeqarfiit inuussutissalerisut pillugit Kalaallit Nunaannut nalunaarut

Inuussutissat il.il. pillugit inatsisip Kalaallit Nunaanut atuutilersinnera pillugu peqqussut nr. 523, 8. juni 2004-imeersumi § 9, imm. 2, § 10, imm. 1, § 27, imm. 2, § 35, imm. 2, § 36, § 39, § 44, imm. 1, § 45, § 46, imm. 2 aamma 3, § 47, § 47, § 49, imm. 2, § 50, imm. 2, § 56 aamma § 69, imm. 3-4 aamma uumasuni nappaatit tunillannartullu pillugit inatsisip Kalaallit Nunaanni atuutilersinneqarnissaanik peqqussummi nr. 524, 8. juni 2004-meersumi § 20, aamma § 41, imm. 2 naapertorlugit aalajangersarneqarpoq:

### Immikkoortoq I

#### Nalunaarutip atuuffia nassuiaatillu

##### Kapitali 1

##### *Atuuffia nassuiaatillu*

§ 1. Nalunaarummi matumani suliffeqarfinnut inuussutissalerisunut atuuttunik inuussutissat pillugit eqqiluisaarnissamut aalajangersakkat aalajangersarneqarput, tassa tunngaviit tulliuttut immikkut isiginiarneqassammata:

- 1) Inuussutissat isumannaatsuunissaannut akisussaaffik pingaarneq suliffeqarfimmi inuussutissalerisumiippoq.
- 2) Inuussutissat pinngortitamiiit tunisassarilerneranniit nerisassanngortinnerisa tungaannut isumannaatsuunissaat pisariaqarpoq.
- 3) Inuussutissat avatangiisit kiassusiatigut isumannaatsumik toqqortarineqarsinnaanngitsut nillertumiitinnerisa allanngortinnginnissaat pingaaruteqarpoq, pingaartumik inuussutissat qerititat.
- 4) Suleriaatsit HACCP-imi tunngavinnik tunngaveqartut nalinginnaasumik eqqunneqarnerat pitsaasumik eqqiluisaarnermut suleriaaseqarnermik tapertaqartikkaanni, suliffeqarfiup inuussutissalerisup akisussaaffimminik tigusinera pitsaanerulertussaassaaq.
- 5) Ajunngitsumik suleriaaseqarnermut najoqqutat inuussutissatigut eqqiluisaarnermut aalajangersakkanik malitsinissamut HACCP-milu tunngavinnik atuinissamut inuussutissat suliarineranni tamarmi suliffeqarfinnut inuussutissalerisunut sakuupput pingaarutillit.
- 6) Tappiorannartutigit aalajangiinermut tunngaviit aamma aarlerinartunik ilisimatuussutsikkut naliliineq tunngavigalugu kiassutsimik/nillissutsimik piumasaqaatit pillugit Kalaallit Nunaannut nalunaarut qaqugukkulluunniit atuuttoq naapertorlugu tappiorannartut pillugit aalajangiinermut tunngavinnik aalajangersaasoqassaaq.
- 7) Inuussutissat eqqussorneqartut minnerpaamik EU-mi tunisassiaasimasutut imaluunniit taakkununga nallersuunneqartutut pitsaassuseqarnissaasa qulakkeernissaat pisariaqarpoq.

*Imm. 2.* Inuussutissanik tunisassiornermi, suliarinninnermi nassiussuinermilu kiisalu avammut niuernerme immikkoortut tamarmik nalunaarummut ilaapput.

*Imm. 3.* Suliffeqarfinnut taamaallaat Kalaallit Nunaanni niuerfinnut inuussutissanik tunisassiornerut, imaluunniit suliffeqarfinnut inuussutissanik uumasunit pisuunngitsunik tunisassiortunut nalunaarut atuutinngilaq, taamaattoq tak. § 2

§ 2. Eqqusuinermut atatillugu uumasut peqqissuunissaannut tunngasutigut piumasaqaatit, kapitali 9-mik malinnittut, suliffeqarfinnut inuussutissalerisunut Kalaallit Nunaanni niuerfinnut tunisassiortunut tamanut atuupput.

## Kapitali 2

### *Nassuiaatit*

§ 3. Inuussutissat pillugit inatsisini pineqarput peqqussutit, nalunaarutit aamma allaffissornikkut aalajangiinerit, Kalaallit Nunaanni inuussutissanut tamakkiisumik ilaannakortumilluunniit inuussutissanik uumasunit pisunik akulinnut atorneqartut, taamaattoq inuussutissat, taamaallaat Kalaallit Nunaanni niuerfimmuut aalajangerneqarsimasut ilanngunnagit.

*Imm. 2.* Suliffeqarfimmi inuussutissalerisumi pineqarpoq inuk inuilluunniit imaluunniit inatsisitigut pisinnaatitaasut pisussaataasullu, suliffeqarfimmi pineqartumi pineqartup aqutsisuuffigisaani inuussutissat pillugit inatsisini aalajangersakkat malinneqarnissaannut akisussaasoq akisussaasulluunniit. Suliffeqarfik inuussutissalerisoq pisortanit namminersortuniilluunniit ingerlataasinnaavoq, iluanaaruteqarani imaluunniit iluanaaruteqarnissamik siunertaqarluni tunisassiornerup, suliarinninnerup imaluunniit nassiussuinerup ilaanik suugaluartumilluunniit suliaqartoq.

*Imm. 3.* Suliffeqarfimmi pineqarpoq inuussutissalerinermik suliffeqarfiup immikkoortua sunaluunniit.

*Imm. 4.* Nittarsaanermi pineqarpoq tunisinissaq siunertaralugu inuussutissanik pigisaqarnek, tassunga ilanngullugu akissarsiaqarluni akissarsiaqaraniiluunniit tuniniaaneq allatigulluunniit nuussineq, tassunga ilanngullugu tunisinertaa namminermi aamma nassiussuineq, nuussinerlu namminermi allatut iliuseqarluni ingerlanneqartoq.

*Imm. 5.* Aarlerinartoqarnerani pineqarpoq periutsip peqqissutsimut ajoqutaasumik sunniuteqarnissaata aarlerinaataa, sunniutip taassuma qanoq qanimanartoqartigineranut naleqqiullugu.

*Imm. 6.* Aarlerinartoqarnernik nalilersueqqissaarnermi pineqarpoq suleriaaseq immikkoortunik pingasunik imminnut ataqatigiissunik immikkoortulik: aarlerinartoqarneranik nalilersuineq, aarlerinartunik aqutsineq aamma aarlerinartut pillugit attaveqatigiinneq.

*Imm. 7.* Aarlerinartoqarneranik nalilersuinermi pineqarpoq suleriaaseq ilisimatuussutsimik tunngaveqartoq immikkoortunik sisamanik immikkoortulik: ulorianartup paasineqarnera, ulorianartup qanoq ittuuneranik paasiniaaneq, tunillaassuussinnaaneranik naliliineq aamma aarlerinartunngorsinnaanerata qanoq ittuunera.

*Imm. 8.* Aarlerinartunik aqutsinermi pineqarpoq suleriaaseq, illuatungeriit soqutiginnittut isumasioqatigalugit suliniarnissamut periarfissat assigiinngitsut nalilersorneqartarnerat, aarlerinartunik naliliinerup pissutsillu allat attuumassuteqartut nalilersoqqinneqartarnerat, kiisalu pisariaqarpat pitsaaliuinermut nakkutilliinermullu periarfissanik tulluurtunik toqqaasoqartarnera aarlerinartumik naliliinermut assigiinngissutaalluni.

*Imm. 9.* Aarlerinartut pillugit attaveqatigiinnermi pineqarpoq immikkut ilisimasallit aarlerinartunik naliliisartut, aarlerinartunik aqutsinermi suliap ingerlanerani aaljangiisartutut akisussaasut, atuisut, suliffeqarfiit nerukkaatissiorut, suliffeqarfiit inuussutissalerisut, ilinniagartuut kiisalu illuatungeriit allat soqutigisallit akornaminni suleqatigiillutik paasissutissanik isummanillu paarlaasseqatigiittarnerat, taamatut iliornermi ulorianartut aarlerinartullu, pissutsit arlerinartunut attuumassuteqartut kiisalu aarlerinartunik paasinnermut tunngasut tunngavigineqarlutik, ilanngullugulu aarlerinartunik nalilersuinermi inernerit nassuiarneri aamma aarlerinartunik aqutsinermut atatillugu aaljangiinernut tunngavigineqartut.

*Imm. 10.* Ulorinartumi pineqarpoq inuussutissat uumassusilitsigut, akuutissatigut imaluunniit piunerminni tunillannartoqarsinnaassutsikkut imaluunniit inuussutissat qanoq ittuunerisigut peqqissutsimut ajoqutaasinnaasumik sunniutigisinnaasaat.

*Imm. 11.* Tumisiorneqarsinnaanerini pineqarpoq inuussutissat imaluunniit uumasup inuussutissanik tunisassiornermut atorneqartup, imaluunniit akuutissap inuussutissamut akuliunneqartussasut aaljangigaasup, imaluunniit taamatut atorneqartussatut naatsorsuutigineqarsinnaasup tunisassiornermi, suliarinninnermi nassiussuinermilu immikkoortuni tamani tumisiorneqarsinnaanera.

*Imm. 12.* Tunisassiornermut, suliarinninnermut nassiussuinernullu immikkoortuni pineqarput immikkoortut tamarmik, ilanngullugu eqqussuineq, inuussutissat aallaqqaammut tunisassiarineraniit toqqortarineqalernissaanut, assartorneqarneranut, tunineqarneranut imaluunniit naggammik atuisumut tunniunneqarneranut.

*Imm. 13.* Siullertut tunisassiornermi pineqarpoq tunisassianik pinngortitameersunik tunisassiorneq, uumasuuteqarneq naatitsinerluunniit, ilanngullugit katersineq, immuiaaneq aamma toqoragassanik uumasuutininik piaqqiortitsineq. Taaguummot aamma ilaapput piniarneq aalisarnerlu tunisassianillu pinngortitap tunniussinnaasaanik katersineq.

*Imm. 14.* Siullertut tunisassiani pineqarput siullertut tunisassiornermit tunisassiat, ilanngullugit nunaateqarnermit uumasuuteqarnermillu tunisassiat, kiisalu piniarnermit aalisarnermiillu tunisassiat.

*Imm. 15.* Inaarutaasumik atuisoq tassaavoq inuussutissanik kingulersaalluni atuisoq, suliffeqarfimmi inuussutissalerisumi sulianut imaluunniit ingerlatanut atasumik nioqqutissanik atuisuunngitsoq.

*Imm. 16.* Inuussutissanik eqqiluisaarnermi, kingorna eqqiluisaarnermik taaneqartumi, pineqarput iliuutsit piumasaqaatillu aarlerinartut aqussinnaaneranut pisariaqartinneqartut,

inuussutissallu siunertarineqartutut atorneqarpata, inuussutissat nerisassatut naleqquttuunerat qulakkeerlugu.

*Imm. 17.* Oqartussatut piginnaasutut pineqarput qitiusumik oqartussat, Kalaallit Nunaanni nalunaarutip matuma eqqortinneqarneranik nakkutilliinissamat piginnaatitaasut, imaluunniit oqartussat allat, oqartussanit qitiusunit piginnaatitaaffimmik tamatuminnga tunineqarsimasut.

*Imm. 18.* Naligititami pineqarpoq aaqqissuussinerit assigiinngitsut eqqarsaatigalugit: anguniakkap assinganik angusaqarsinnaasoq.

*Imm. 19.* Akuleriissitsinermi pineqarpoq aarlerinartoqarnera imaluunniit aarlerinartoqalernerera.

*Imm. 20.* Imissami pineqarpoq imeq EU-p peqqussutaani 98/83/EF kingusinnerusukkullu allannguuteqartumi piumasagaatinut minnerpaaffiliussanik kiisalu erngup pitsaassusaa aamma imeqarfinnik nakkutilliineq pillugu Namminersornerullutik Oqartussat nalunaarutaannik eqqortitsisoq.

*Imm. 21.* Tarajulimmi sukuluitsumi pineqarpoq imaq pinngortitami pissusissamisoortumik tarajulik, imaluunniit imeq nammineq taratsigaq, imaluunniit imaq imermik akusaalluni tarajornilaartoq sukuluiaagaasoq, akuutissanik ajoqutaasinnaasunik imaluunniit planktoninik imarmiunik toqunartulinnik ima annertutigisunik akoqanngitsaq, inuussutissat peqqissutsikkut pitsaassusiannut toqqaannartumik toqqaannangitsumilluunniit ajoqusiisinaanani.

*Imm. 22.* Imeq sukuluitsumi pineqarpoq imeq imaaneersoq sukuluitsaq aamma imiinnaq taamaaqataanik pitsaassuseqartoq.

*Imm. 23.* Poortuutini pineqarpoq inuussutissanik poortuutissiamut ikioraavimmuulluunniit inissiineq, inuussutissat pineqartut poortuutissiamut ikioraavimmulluunniit pineqartumut toqqaannartumik attuutsillugit.

*Imm. 24.* Poortuinnermi/poortuutissiami pineqarput inuussutissamik ataatsimik inuussutissanilluunniit arlalinnik poortoriikkanik ikioraavimmuut silarlinngortitamut inissiineq, ikioraavillu taanna pineqartoq.

*Imm. 25.* Ikioraavimmi silaannaarlugu matusaasumi pineqarpoq ikioraavik, imaa ulorianartunut avataaneersunut illersorniarlugu ilusiligaasoq.

*Imm. 26.* Suliarinninnermi pineqarpoq iliuuseq sugaluarterluunniit, aallaqqaammut tunisassiasup annertuumik allanngortinneqarneranik qulakkeerinnittoq, ilaatigut kissartumik suliarineratigut, pujoorneratigut, tarajorterneratigut, ineritinneratigut, panerserneratigut, imilitserneratigut, kimiirneratigut imaluunniit suleriaatsit taakku ataatsimoortinnerisigut.

*Imm. 27.* Tunisassiani sularineqarsimangitsuni pineqarput inuussutissat sularineqarsimangitsut, aamma ilaallutik tunisassiat assersuutigalugu avissaartinneqarsimasut, sequtserneqarsimasut, avinneqarsimasut, aggorneqarsimasut, saaniarneqarsimasut, aserorterneqarsimasut, ameerneqarsimasut, aatorneqarsimasut,

qajuusaasiarineqarsimasut, aggulunneqarsimasut, salinneqarsimasut, ujaluarneqarsimasut, qaleruaarneqarsimasut, qalipaajarneqarsimasut, sequtsiganngortinneqarsimasut, nillataartinneqartut, qeritinneqarsimasut imaluunniit aasserneqarsimasut.

*Imm. 28.* Tunisassiani suliarineqarsimasuni pineqarput tunisassiat suliarineqarsimanngitsut suliaralugit inuussutissat pilersinneqartut. Tunisassiat akuutissanik suliarineqarneranut pisariaqartunik, imaluunniit tunisassiat immikkut piginnaaneqarnissaannut pisariaqartunik akoqarsinnaapput.

*Imm. 29.* Uillut il.il. pineranni pineqarput qimerloqannngitsut illugiinnik qaleruallit, kapinartuusalinneq amillit, uumasut puullit aamma siuteqqut imarmiut.

*Imm. 30.* Nunani niueqatigisani pineqarput EU-mi nunat, Norge, Island, Liechtenstein, Andorra, Savalimmiut aamma Schweiz. Nunat taakku katillugit taaneqarput niueqatigisat. Immikkoortut uku niueqatigisanut ilaanngillat:

- 1) Kunneqarfimmi Spaniami Ceuta aamma Melilla,
- 2) Kunngiitsuuffimmi Frankrigimi nunat nunallu immikkoortui imarpiup akianiittut, imaluunniit
- 3) Kunneqarfimmi Danmarkimi Savalimmiut (taamaattoq aalisakkanik nioqqutissat uillullu uumasut il.il. niueqatigiinnermut ilaapput).

*Imm. 31.* Inuussutissani assigiissaagaanngitsuni pineqarput inuussutissat, taakku pillugit eqquusuinnermut piunasaqaatinik EU-mi ataatsimoorussamik aalajangersaaffigineqarsimanngitsut.

*Imm. 32.* Ilanngussani oqaatsit “pisariaqassappat”, “naleqqutissappat”, “tulluartumik” aamma “naammattumik” isumaqarput nalunaarummi anguniagaq naammassiniarlugu pisariaqartut, naleqquttut imaluunniit tulluartut imaluunniit naammattut.

§ 4. Ilanngussaq 1-imi nassuiaatit aamma ilanngussaq 4-13-imi teknikkikkut nassuiaatit nalunaarutit matuma atorneqarnerani atuupput.

## **Immikkoortoq II**

### **Suliffeqarfiit inuussutissalerisut pisussaaffii**

#### Kapitali 3

##### *Pisussaaffiit nalinginnaasut*

§ 5. Suliffeqarfiup inuussutissalerisup qulakkiissavaa tunisassiornerup, suliarinninnerup nassiussuinerullu immikkoortuini tamani nammineq nakkutigisaminni, nalunaarummi matumani eqqiluisaarnermut aalajangersakkanut attuumassuteqartunut, ilanngullugit ilanngussaq 1-13-imi eqqiluisaarnermut aalajangersakkanut, naapertuunnissaat.

§ 6. Suliffeqarfiit inuussutissalerisut tunisassiat uumasunit pisut qaavisa mingunnerisa peernissaannut, nalunaarut manna malillugu ajornangippat, imissamik imaluunniit imermik sukuluitsumik allaanerusunik akuutissartalinnik atuisannagillat, aatsaat akuutissap atornerqarnissaa EU-mit akuerineqarsimappat atuisinnaallutik. Akuutissat ataasiakkaat akuersissutigineqarnerinut atatillugu piumasaqaatit akuersissutigineqarsimasinnaasut tamaasa suliffeqarfiup inuussutissalerisup aamma malissavai. Akuutissanik akuerineqarsimasumik atuinerup suliffeqarfiup inuussutissalerisup nalunaarummi matumani aalajangersakkanik eqqortitsinissaanut pisussaaffia kalluanngilaa.

#### Kapitali 4

##### *Eqqiluisaarnermut aalajangersakkat nalinginnaasut immikkullu ittut*

§ 7. Suliffeqarfiit inuussutissalerisut, siullertut tunisassiaasunik ingerlatanillu taakkununga atasunik suliaqartut, tak. ilanngussaq 2, ilanngussaq 2-mi immikkoortoq A-mi eqqiluisaarnissamut piumasaqaatit nalinginnaasut kiisalu nalunaarut manna malillugu immikkut piumasaqaatit eqqortissavaat.

*Imm. 2.* Suliffeqarfiit inuussutissalerisut, tunisassiornerup, suliarinninnerup nassiussuinerullu ilaanik, imm. 1-ip atuuffigisaanik suliaqartut, nalunaarummi matumani eqqiluisaarnissamut aalajangersakkanik eqqortitsissapput, ilanngullugit ilanngussaq 1-imi aamma ilanngussaq 3-13-imi eqqiluisaarnissamut aalajangersakkanik eqqortitsisallutik.

*Imm. 3.* Suliffeqarfiit inuussutissalerisut pissutsit apeqqutaatillugit eqqiluisaarnissamut tulliuuttunik immikkut ittumik iliuuseqassapput:

- 1) Inuussutissat pillugit tappiorannartutigut tunngavigineqartunik naammassinnineq.
- 2) Suleriaatsinik anguniakkat nalunaarummi matumani siunertat eqqortinniarlugit pisariaqartinneqartunik.
- 3) Inuussutissat pillugit kissassutsimik nakkutilliinermi piumasaqaatit naammassillugit.
- 4) Nillataartumiititsineq allanngortinnagu.
- 5) Misiligitissanik tigusinerit misissuinerillu.

*Imm. 4.* Tunngavigineqartut, piumasaqaatit anguniakkallu imm. 3-mi pineqartut, kiisalu taakkununga atasumik misiligitissanik tigusinerit misissuinerillu, EU-mit aalajangersarneqassapput.

§ 8. Misiligitissanik tigusineq imaluunniit misissuinermi periutsit pillugit nalunaarut manna erseqqinnerusunik imaqqangippat, suliffeqarfiit inuussutissalerisut periutsit naleqquttut, EU-mi inatsisini imaluunniit nunami namminerimi inatsisini aalajangersagaasut atorsinnaavaat, imaluunniit taamatut ittunik peqqangippat, periutsit taamaaqataannik periutsinik atuinerimi angusanut nallersuunneqartunik inerneqartartut atorsinnaallugit, maleruagassat protokolillu nunat tamat akornanni akuerisaasut naapertorlugit ilisimatuussutsikkut akuerineqarsimanissaat piumasaqaatigalugu.

## Kapitali 5

### *Nalunaarsuineq, piginnaatitaaneq aamma pisortat nakkutilliinerat*

§. 9. Suliffeqarfiit inuussutissalerisut tunisassianik uumasunit pisunik taamaallaat nittarsaasinnaapput, taamaallaat suliffeqarfimmi:

- 1) nalunaarummi matumani piumasaqaatinik aamma inuussutissat pillugit inatsisini piumasaqaatinik attuumassuteqartunik allanik naammassinnittumi, aamma
- 2) Fødevarestyrelsimi nalunaarsorsimasumi imaluunniit imm. 2 malillugu Fødevarestyrelsimit piginnaatitaasumi piareersarneqarsimappata passunneqarsimallutillu.

*Imm. 2.* Suliffeqarfiit inuussutissalerisut, nalunaarummi matumani ilanngussaq 6-13-imi piumasaqaatinut ilaasut, taamaallaat ingerlanneqarsinnaapput imm. 3 naapertorlugu Fødevarestyrelsimit piginnaatitaappata, suliffeqarfiit ukuninngaannaq ingerlataqartut minillugit:

1. Pingaarnertut tunisassiorneq.
- 2) Assartuineq.
- 3) Tunisassianik kiassutsikkut naleqqussagaasariaqanngitsumi toqqortarineqarsinnaasunik toqqortarinneq.

*Imm. 3.* Suliffeqarfik, imm. 2 malillugu piginnaatinneqartussaq ingerlatseqqusaanngilaq, Fødevarestyrelsi:

- 1) sumiiffimmut ataasiarluni pulaarnerup kingorna sulinissamut piginnaatitsinerminik suliffeqarfimmut nalunaaruteqarsimangippat, imaluunniit
- 2) sumiiffimmut pulaarnerup kingorna piumasaqaateqarluni piginnaatitsinerminik suliffeqarfimmut nalunaaruteqarsimangippat.

*Imm. 4.* Suliffeqarfiit inuussutissalerisut, ilanngullugit siulliullutik tunisassiortut aamma suliffeqarfiit allaffissortut, imm. 2 malillugu piginnaatitaasinnaanngitsut, aatsaat Fødevarestyrelsimi nalunaarsorneqarsimagunik inuussutissanik uumasunit pisunik nittarsaasinnaapput.

*Imm. 5.* Tunisassianik uumasunit pisunik nerisassanik pisortat nakkutilliinerisa aaqqissuunneqarneranut aalajangersakkat immikkut ittut pillugit Kalaallit Nunaannut nalunaarut malillugu suliffeqarfiit inuussutissalerisut Fødevarestyrelsimik suleqateqassapput. Pingaartumik Fødevarestyrelsip piginnaatitsissut utertippagu, imaluunniit piumasaqaatitalimmik piginnaatitsissut sivitsorneqanngippat, imaluunniit tamakkiisumik piginnaatitsissummik kinguneqanngippat, ingerlatsinerup unitsinneqarnissaa Fødevarestyrelsip qulakkiissavaa.

§ 10. Suliffeqarfiit, § 9, imm. 2 malillugu piginnaatitsissummik qinnuteqartut, immersugassaq piginnaatitsissummik qinnuteqarnermut atorneqartussaq, imaluunniit suliffeqarfiup inuussutissalerisup nalunaarsorneqarnissaanut nalunaarummut atorneqartussaq atussavaat, taanna atorlugu Fødevarestyrelsip nittartagaanut isertoqarsinnaalluni. Suliffeqarfiup qinnuteqaammut ilanngullugu suliffeqarfiup titartarneqarnera allaaserineqarneralu kiisalu ingerlatassat eqqarsaatigineqartut allaaserineqarneri nassiutissavai. Aammattaaq suleriaatsit § 19-imi taaneqartut allaaserineqarneri suliffeqarfiup ilanngutissavai.

*Imm. 2.* Tunisassianik uumasunit pisunik nerisassanik pisortat nakkutilliinerisa aaqqissuunneqarneranut aalalajangersakkat immikkut ittut pillugit Kalaallit Nunaannut nalunaarut malillugu suliffeqarfimmuk nakkutilliilluni pulaarnerup kingorna, kingusinnerpaamik sapaatit akunneri sisamat qaangiutsinnagit Fødevarestyrelsi aalajangiissaaq.

*Imm. 3.* Imm. 2-imi piffissaliussaq ataasiarluni sivitsorneqarsinnaavoq, suliap annertussusiata tamanna pisariaqartippagu. Fødevarestyrelsi sivitsuinerumut sivitsuinerullu sivisussusianut tunngavilersuuteqassaaq, piffissaliussallu imm. 2-mi taaneqartup naannginnerani tamanna qinnuteqartumut nalunaarutigalugu.

*Imm. 4.* Fødevarestyrelsi piginnaatitsinerminik imaluunniit piumasagaateqarluni piginnaatitsinerminik nalunaaruteqartinnagu suliffeqarfik inuussutissalerinerminik suliaminik aallartitsissanngilaq, tak. Tunisassianik uumasunik pisunik nerisassanik pisortat nakkutilliinerisa aaqqissuunneqarnerannut aalajangersakkat immikkut ittut pillugit Kalaallit Nunaannut nalunaarut.

**§ 11.** Suliffeqarfiit inuussutissalerisut, § 9, imm. 4 malillugu Fødevarestyrelsimi nalunaarsorneqartussat tamanna Fødevarestyrelsimut nalunaarutigissavaat. Nalunaarsorneqarnissamut nalunaarnermi immersugassaq § 10, imm. 1-imi taaneqartoq atorineqassaaq.

*Imm. 2.* Suliffeqarfiup inuussutissalerisup inuussutissalerinerminik sulinini aallartissinnaavaa, suliffeqarfik Fødevarestyrelsimi nalunaarsorneqareerpat.

*Imm. 3.* Nalunaarutip tiguneqarneraniit kingusinnerpaamik sapaatit akunnerisa sisamat qaangiutinnginneranni nalunaarsorneqarneq Fødevarestyrelsip allakkatigut uppersassavaa, taamaattoq tak. imm. 4.

*Imm. 4.* Piffissaliussaq imm. 3-imi pineqartoq ataasiarluni sivitsorneqarsinnaavoq, suliap annertussusiata tamanna pisariaqartippagu. Fødevarestyrelsi sivitsuinerumut sivitsuinerullu sivisussusianut tunngavilersuuteqassaaq, piffissaliussallu naannginnerani tamanna qinnuteqartumut nalunaarutigissallugu.

**§ 12.** Akuersissut nutaamik pissarsiarineqassaaq:

- 1) illutaatigut annertuumik allannguisoqarpat,
- 2) suliffeqarfiup iniatigut aaqqissuunnerani annertuumik allannguisoqarpat,
- 3) suliffeqarfiup tunisassiornerani imaluunniit nioqqutissaataani assigiinngiaartuni annertuumik allannguisoqarpat, imaluunniit
- 4) inatsisitigut piumasagaataasumik nammineq nakkutilliinissaq eqqunneqarpat, imaluunniit nammineq nakkutilliinerminni tassani annertuumik allannguisoqarpat.

*Imm. 2.* Imm. 1 malillugu nutarternissaanik qinnuteqarnermi, suleriaaseq § 10, imm. 1-imi taaneqartoq malinneqassaaq.

**§ 13.** Suliffeqarfiup nalunaarsorneqarsimasup ingerlataani allannguutit annertuut Fødevarestyrelsimut nalunaarutigineqassapput.

*Imm. 2.* Imm. 1 malillugu allannguutini annertuuni suleriaaseq § 11, imm. 1-imi pineqartoq malillugu nalunaarutigineqassapput.



**§ 14.** Suliffeqarfimmi piginnaatitaasumi nalunaarsorsimasumiluunniit piginnittut nikippata, suliffeqarfimmik tiguisup kingusinnerpaamik piffissami tigussiffiusumi piginnittut nikinnerat Fødevarestyrelsimut nalunaarutigissavaa.

*Imm. 2.* Piginnittut nikinnerannik nalunaaruteqarnermi immersugassaq § 10, imm. 1-imi taaneqartoq atorneqassaaq.

*Imm. 3.* Suliffeqarfiup piginnittuisa nikinnerisa kingorna nutaamik piginnaatitsisoqarnissaa imaluunniit nalunaarsuisoqarnissaa utaqeqqaarnagu suliffeqarfiup maannamut ingerlatani ingerlateqqiinnarsinnaavai. Fødevarestyrelsi ingerlatanik allanik piginnaatitsinerminik imaluunniit nalunaarsuisimanerminik nalunaaruteqartinnagu, suliffeqarfiup ingerlatat allat aallartissinnaanngilai.

**§ 15.** Kingullermik piginnaatitsinermiit ukiut tallimat ingerlasimappata akuersisimaneq Fødevarestyrelsimut nutaamik suliarineqarsinnaavoq.

**§ 16.** Fødevarestyrelsi piginnaatitsissummik arsaarinnissinnaavoq, imaappat:

- 1) suliffeqarfiup piumasaqaatigineqartut naammassinngippagit,
- 2) piginnaatitsinermut piumasaqaatit annertuumik allanngorpata, imaluunniit
- 3) eqqiluisaarnikkut, nittarsaassinikkut, akitsuuteqartitsinikkut assigisaatigulluunniit peqquteqartumik tamanna pisariaqartinneqartutut nalilerneqarpat.

*Imm. 2.* Piginnaatitsissumik arsaarinninnerup kingorna piginnaatitsissutip nutarterneqarnerani, suliffeqarfiup maannamut ingerlanneqarnera il.il. tunuliaqutaralugit Fødevarestyrelsi immikkut ittunik atugassaqartitsissaaq.

**§ 17.** Suliffeqarfiit inuussutissalerisut inatsisit allat atuuttut malillugit Fødevarestyrelsimik suleqateqassapput.

*Imm. 2.* Suliffeqarfiit inuussutissalerisut inuussutissanik tunisassiornermik, suliarinninnermik nassiussuussinermilluunniit akisussaasut, suliffeqarfiup pineqartup nalunaarsorneqarnissaa siunertaralugu, styrelsip piumasaqaataatut iliorlutik pingaartumik Fødevarestyrelsimut nalunaaruteqartassapput.

**§ 18.** Suliffeqarfiit inuussutissalerisut inuussutissat pillugit inatsimmi unioqquitsineq pillugu isorineqartut (erseqqissaanerit, peqqusinerit, inerteqqutit, akiliisitaanerit imaluunniit politiinut unnerluutigineqarneq) pissutsit inuussutissalerineq pillugu inatsimmut naapertuutilereri pillugit uppernarsaammik Fødevarestyrelsimut nassiussissapput. Fødevarestyrelsi allamik piffissaliinngippat, isorinninnerup suliffeqarfimmut nalunaarutiginerata kingorna ullut 14-it qaangiutsinnagit uppernarsaat nassiunneqassaaq.

*Imm. 2.* Inuussutissat pillugit inatsimmik eqqortitsineq naleqqunnerusumik allatigut nakkutigineqarsinnaasoq aqutsisoqarfik naliliippat, suliffeqarfiup tamatumunnga uppernarsaammik nassiussinissaa, tak. imm. 1, immikkut pisoqartillugu Fødevarestyrelsimut pinngitsoortinneqarsinnaavoq.

## Kapitali 6

*Aarlerinartunik misissuineq aamma killiffiit nakkutigisat ajornartoorfusinnaasut kiisalu eqqiluisaarnermi pitsaasumik suleriaaseqarnermut najoqqutassat*

**§ 19.** Suliffeqarfiit inuussutissalerisut suleriaatsinik aalajangersimasunik imaluunniit suleriaatsinik aalajangersimasunik HACCP-imik tunngavinnik tunngaveqartunik eqqussissapput, aallartitsillutik malinnillutillu.

*Imm. 2.* Imm. 1-imi HACCP-imik tunngavinni pineqarput:

- 1) Aarlerinartut pitsaaliorneqartussat, peerneqartussat imaluunniit naammaginartumik annertussuseqalersillugit annikillisinneqartussat sueneri paasillugit.
- 2) Tunisassiornermi killiffimmi imaluunniit killiffinni nakkutigisat ajornartoorfusinnaasut sueneri paasillugit, aarlerinartup pitsaaliornissaanut, peernissaanut imaluunniit naammaginartumik annertussuseqalersinnissaanut tunisassiornerup aqussinnaanera pineqartuni pingaaruteqarmat.
- 3) Aarlerinartunik sueneri paasineqareersunik pitsaaliuinissaq, peersinissaq imaluunniit annikilliliinissaq siunertaralugu killiffinni nakkutigisani ajornartoorfusinnaasuni ajornartoornermut killiliussat pissutsinik akuersaarneqarsinnaasunik pissutsinit isornartuniit avissaartitsisut aalajangersarlugit.
- 4) Killiffinni nakkutigisani ajornartoorfusinnaasuni nakkutilliinnermut suleriaatsinik angusaqarfiulluqartunik aalajangersaaneq piviusunngortitsinerlu.
- 5) Nakkutilliinnermi paasineqarpat killiffik ajornartoorfusinnaasoq nakkutigineqanngitsaq, iliuutsit aaqqiissutaasut aalajangersarlugit.
- 6) Iliuutsit nr. 1-5-imi allaaserineqartut angusaqarfiulluqartumik ingerlanersut nakkutiginiarlugi akuttunngitsumik nakkutilliisarnissamut suleriaaseqarnissaq aalajangersarlugu.
- 7) Iliuutsit nr. 1-6-imi atorineqartut angusaqarfiulluqartumik atorineqarnerat uppernarnarsarniarlugu, suliffeqarfiup qanoq ittuuneranut angissusaanullu naapertuuttumik uppernarsaasiorneq nalunaarsuinerillu.

*Imm. 3.* Tunisassiami, suleriaatsimi killiffimmiluunniit suugaluqartumi allannguisoqarpat, suliffeqarfiup inuussutissalerisup suleriaaseq nutartissavaa pisariaqartutigullu allannguilluni.

*Imm. 4.* Taamaallaat suliffeqarfinnut inuussutissalerisunut, inuussutissanik siullertut tunisassiornerup, ingerlatallu allat tassunga attuumassuteqartut kingorna tunisassiornerup, suliarinninnerup nassiussuinerullu ilaanik suliaqartunut imm. 1 atuuppoq, tak. ilanngussaq 2.

*Imm. 5.* Suliffeqarfiit inuussutissalerisut suliassaat:

- 1) Imm. 1-ip Fødevarestyrelsen noqqaassutigisaatut ilusilimmik eqqortinneqarnera pillugu uppernarsaammik Fødevarestyrelsimut saqqummiussillutik, suliffeqarfiup qanoq ittuunera angissusaalu eqqarsaatigalugit,
- 2) uppernarsaatit tamarmik, aalajangersagaq manna naapertorlugu suleriaatsinik ineriartortinneqartunik allaaserinnittut ataavartumik nutarterneqartarnissaat qulakkeerlugu, aamma
- 3) uppernarsaatit nalunaarsukkallu tamaasa piffissami naleqquttumi toqqortaralugit.

**§ 20.** Suliffeqarfiit inuussutissalerisut, toqoraavimmik ingerlataqartut, uumasut toqorarneqartussat, uumasut nujuartat alliertortitat ilanngullugit, toqoraaneq sioqqullugu uumasut nakorsaananerani misissorneqarsimanissaat qulakkeerniarlugu pisariaqartunik

iliuseqassapput, aamma uumasut suli uumaneranni uumasut nakorsaaneranit toqorarneqartussatut naleqquttutut nalilerneqartut kisimik nerisassanngortitassatut toqorarneqassapput.

*Imm. 2.* Suliffeqarfiit inuussutissalerisut, toqoraavimmik ingerlataqartut toqoraanerup kingorna uumasup immikkoortuisa tamarmik, aak ilanngullugu, uumasut nakorsaanerannit misissorneqarnissaat qulakkeerniarlugu pisariaqartunik iliuseqassapput.

*Imm. 3.* Suliffeqarfiit uumasunik piniakkanik passussisut, uumasup immikkoortuisa tiguneqartut tamarmik uumasut nakorsaanerannit misissorneqarnissaat qulakkeerniarlugu pisariaqartunik iliuseqassapput.

**§ 21.** Eqqiluisaarnermi pitsaasumik suleriaaseqarnissamut aamma HACCP-imi tunngaviit atornissaannut najoqqutassanik inuussutissalerinermik suliaqartut suliaqarsinnaapput. Suleriaatsit § 19-imi taaneqartutut ittut eqqunneqarnerannut atatillugu suliffeqarfiit inuussutissalerisut najoqqutassanik taamatut ittunik atuisinnaapput.

*Imm. 2.* Pitsaasumik suleriaaseqarneq pillugu najoqqutassanik inerisaasoqarpat inuussutissalerinermik suliaqartut tulliuuttunik ineriartortitsissapput taakkulu siaruaallugit:

- 1) illuatungeriit soqutigisaat annertuumik kalluarneqartut, assersuutigalugu oqartussat piginnaatitaasut atuisartullu sinniisaat isumasioqatigalugit,
- 2) Codex Alimentariusimi periuseq pillugu malittarisassat attuumassuteqartut eqqarsaatigalugit, aamma
- 3) Ilanngussaq 2-mi immikkoortoq B-mi innersuussinerit eqqarsaatigalugit, taakku siullertut tunisassiornermut ingerlatanullu tassunga atassuteqartunut tunngappata, tak. ilanngussaq 2-mi immikkoortoq 1-imi, immikkoortoq A.

*Imm. 3.* Fødevarestyrelsi najoqqutassanik nalilersuissaaq tulliuuttut qulakkeerniarlugit:

- 1) imm. 2 naapertorlugu inerisarsimanissaat,
- 2) imarisaasa immikkoortunut atuuffigisaminnut sulineri atorneqarsinnaanissaat, aamma
- 3) taakku immikkoortuni inuussutissanilu atuuffigisaminni §§ 5, 7, 8 aamma 19-imut naapertuuttuunissaat.

**§ 22.** Misiligutit, suliffeqarfiup nammineq nakkutilliineranut atatillugu tiguneqartut laboriatoriami misissorneqassapput, laboriatoriani pitsaassutsimik qulakkeerinermut tunngaviit akuerisaasut tunngavigalugit piginnaatitaanikkut, piginnaatitsissummik allagartalerneqarnikkut imaluunniit pitsaassusiliinermut periuseqarnermikkut uppersagaasumik pitsaassutsimik nalileeriaaseqartuni.

## Kapitali 7

### *Tumisiuisinnaaneq utertitsinerlu*

**§ 23.** Inuussutissanik uumasunillu inuussutissanik tunisassiornermi atorneqartunik, kiisalu akuutissanik suugaluartunilluunniit inuussutissanut akuliunneqartussanik, imaluunniit akuliunneqartussatut naatsorsuutigineqarsinnaasunik tunisassiornermi, suliarinninnermi nassiusuinermilu immikkoortuni tamani tumisiuisinnaaneq qulakkeerneqassaaq.

*Imm. 2.* Suliffeqarfiit inuussutissalerisut inuussutissat uumasulluunniit inuussutissanik tunisassiornermi atorneqartut, kiisalu akuutissat suulluunniit inuussutissanut

akuliunneqartussat imaluunniit akuliunneqartussatut naatsorsuutigineqarsinnaasut sumit pissarsiarisimanerlugit tamatigut uppersarsarsinnaassavaat.

*Imm. 3.* Siunertamut tamatumunnga aqqissuussinernik suleriaatsinillu pilersitsisoqassaaq, taamaalilluni paasissutissat taamatut ittut noqqaasoqarneratigut Fødevarestyrelsimut atugassanngortinneqarsinnaallutik.

*Imm. 4.* Suliffeqarfiit inuussutissalerisut suliffeqarfiit sinnerisa tunisassiaatimik tunniunneqarfigisaasa paasinissaannut aqqissuussinernik suleriaatsinillu pilersitsissapput. Paasissutissat taamatut ittut noqqaasoqarneratigut Fødevarestyrelsimut atugassanngortinneqarsinnaallutik.

*Imm. 5.* Inuussutissaq nittarsaanneqartoq, imaluunniit Det Europæiske Økonomiske Samarbejdedemi (EØS) nunat ilaanni ataatsimi nittarsaanneqartussatut naatsorsuutigineqartoq, naleqquttumik nalunaaqutserneqassaaq imaluunniit suuneranik ilisarnaaserneqassaaq, uppersarsaat tulluortoq imaluunniit inuussutissat pillugit inatsimmi piumasaqaatit attuumassuteqartut malillugit paasissutissat iluaqutigalugit ajornanngitsumik tumisiuisoqarsinnaassalluni.

**§ 24.** Suliffeqarfik inuussutissalerisoq inuussutissap suliffeqarfiup tunisassiarisimasaata, passussimasaata imaluunniit nassiussuussimasaata, inuussutissat isumannaatsuunissaannik piumasaqaatit eqqortinngikkai isumaqaruni imaluunniit taamatut isumaqarnissamut tunngavissaqaruni, inuussutissarlu suliffeqarfimmit inuussutissalerisumit taassuminnga toqqaannartumik nakkutigineqarunnaarsimappat, inuussutissap pineqartup niuerfiusumiit utertinneqarnissaa siunertaralugu suliffeqarfik ingerlaannartumik iliuseqassaaq, tamannalu pillugu Fødevarestyrelsi ilisimatillugu. Tunisassiaq atuisartunut apuussimappat, nioqqutissap utertinneqarneranut tunuliaqutaasoq pillugu sunniuteqartumik eqqortumillu suliffeqarfik atuisartunut paasissutissiissaaq, peqqissutsimillu illersuinerup qaffasissumik pitsaassuseqarnerata angunissaanut iliuitsit allat naammangippata, nioqqutissaq atuisartumiit nioqqutissamik pineqartumik tigumminnereersumit pisariaqarpat uterteqqullugu.

*Imm. 2.* Suliffeqarfik inuussutissalerisoq nassiussuineramik suliaqarnermut akisussaasoq, inuussutissap poortorneranut, nalunaaqutsersorneranut, isumannaatsuuneranut namminiussusianulluunniit sunniuteqanngitsoq, tunisassiat inuussutissat isumannaatsuunissaannik piumasaqaatinik eqqortitsinngitsut niuerfiusunit utertinneqarnissaat siunertaralugu nammineq ingerlataminut killiliussat iluanni iliuseqassaaq, soorlu aamma inuussutissanik tumisiuisinnaanissamut paasissutissat attuumassuteqartut, ingerlateqqinnerisigut suliffeqarfik inuussutissalerisoq inuussutissat isumannaatsuunissaannut tapertaassasoq, tamatut iliorneq iliussat tunisassiorunit, passussisunit, suliarinnittunit, aamma/imaluunniit Fødevarestyrelsimut aalajangikkat pillugit suleqatigiinnermut ilaavoq.

*Imm. 3.* Inuussutissaq suliffeqarfiup nittarsaassaa inunnut peqqissutsikkut ajoqusiisumik sunniuteqarsinnaasoq suliffeqarfik isumaqaruni imaluunniit taamatut isumaqarnissamut tunngavissaqaruni, suliffeqarfiup inuussutissalerisup Fødevarestyrelsi ingerlaannaq ilisimatissavaa. Inaarutaasumik atuisup aarlerinartorsiortinnissaa pinngitsoortinniarlugu iliussatut aalangiussat pillugit suliffeqarfiup inuussutissalerisup Fødevarestyrelsi

nalunaarfigissavaa, aamma nunami inatsisit inatsisinillu atuineq naapertorlugit Fødevarestyrelsimik suleqateqarnissaannut kinaluunniit akornusertussaanagu imaluunniit qunulersissanagu, tamatut iliornerup inuussutissami aarlerinartuq pitsaaliorsinnaappagu, annikillisinnaappagu imaluunniit peerutsissinnaallugu.

*Imm. 4.* Suliffeqarfik inuussutissalerisoq inuussutissani suliffeqarfiup tunisaani imaluunniit tunisimasaani aarlerinartut pinngitsoortinnissaat imaluunniit annikillinissaat siunertaralugu iliuitsit aalajangiunneqartut pillugit Fødevarestyrelsimik suleqateqassaaq.

## Kapitali 8

### *Peqqissuutsimik suussutsimillu nalunaaqutsiineq*

**§ 25.** Suliffeqarfiit inuussutissalerisut tunisassiat uumasunit pisut, aatsaat suliffeqarfimmi § 9, imm. 2 malillugu piginnaatinneqartussami passunneqarsimappata nittarsaassinnaavaat, tunisassiat uku arlaannik pilerneqarsimappata:

- 1) peqqissuutsimik nalunaaqutsiut tunisassianik uumasunit pisunik nerisassanik pisortat nakkutilliinerisa aqqissuunneqarnerat pillugu immikkut aalajangersakkat pillugit Kalaallit Nunaannut nalunaarut naapertorlugi inissinneqartoq, imaluunniit
- 2) suunerinik nalunaaqutsiut, nalunaarut qulaani taaneqartoq peqqissuutsimik nalunaaqutsiussap inissinneqarnissaa pillugu aalajangersakkamik imaqaangippat, ilaangussaq 4 malillugu inissinneqartoq.

*Imm. 2.* Suliffeqarfiit inuussutissalerisut tunisassiaq uumasunit pisoq suuneranik nalunaaqutsersinnaavaat, aatsaat tunisassiaq nalunaarut manna naapertorlugi tuliareneqarsimappat, aamma suliffeqarfimmi § 9-mi piumasqaatinik eqqortitsisumi suliarineqarsimappat.

*Imm. 3.* Suliffeqarfik inuussutissalerisoq peqqissuunermut nalunaaqutsiummik, tunisassianik uumasunit pisunik nerisassanik pisortat nakkutilliinerisa aqqissuunneqarnera pillugu immikkut aalajangersakkat pillugit Kalaallit Nunaannut nalunaarut malillugu neqimut inissinneqartumik peerseqqusaanngilaq, aatsaat neqi aggorneqarpat, piareersarneqarpat allatigulluunniit suliarineqarsimappat peerneqartussaammat.

## **Immikkoortoq III**

### **Eqqussuineq, avammut niuerneq niueqatigiinnerlu**

## Kapitali 9

### *Eqqussuineq niueqatigiinnerlu*

**§ 26.** Tunisassiat uumasunit pisut taamaallaat nunamit niueqatigisamiit imaluunniit nunamiit imaluunniit nunap ilaanit, EU-p eqqussinissamut akuerisaanit eqqunneqarsinnaapput, taamaattoq tak. imm. 2. Inuussutissat Kalaallit Nunaannut eqqunneqartut inuussutissat pillugit inatsimmi piumasqaatinik attuumassuteqartunik eqqortitsissapput. Eqqiluisaarneq eqqarsaatigalugu piumasqaatit attuumassuteqartut §§ 5, 7, 8, 17 aamma 19-imi allatorneqarput.

*Imm. 2.* Nunanit uumasut peqqissusaannut aarlerinartoqarneranik pasitsaassaqaarnerup imaluunniit paasisaqaarnerup malitsigisaanik killilersuiffigineqartunit eqqussuineq taamaallaat pisinnaavoq Fødevarestyrelsi siumoortumik akuersissuteqareerpat.

**§ 27.** Suliffeqarfiit inuussutissalerisut, tunisassianik uumasunit pisunik nunanit niueqatiginngisamiit pileqqaarfeqartunik eqqussuisut qulakkiissavaat eqqussuineq taamaallaat pisinnaasoq imaappat:

- 1) Nuna nassitsisuusoq, tunisassianik taakkuninnga eqqussuinissamut EU-mit akuerineqarsimasut pillugit EU-p allattuiffiani allassimappat, taamaattoq tak. § 26, imm. 2.
- 2) Suliffeqarfik tunisassianik nassitsisuusoq, aamma tunisassianik suliarinniffiusimasoq imaluunniit tunisassiorfiusimasoq, tunisassianik taakkuninnga eqqussuinissamut EU-mit akuerineqarsimasut pillugit EU-p allattuiffiani allassimappat. Umiarsuit tunisassiorfiusut umiarsuillu qerititsiviit piumasaqaammut aamma ilaapput.
- 3) Qimerloqanngitsut illugiinnik qaleruallit, kapinartuusalinna amillit, uumasut puullit, aamma siuteqqut imarmiut uumasut pineqartillugit, sumiiffik tunisassiorfiusoq allattuiffimmi EU-mit akuerisaasumi allassimappat.
- 4) Tunisassiaq nalunaarummi matumani piumasaqaatinik, ilanngullugu peqqissutsimik suuneranillu nalunaaqutsiinnermut § 25-imi piumasaqaatinik eqqortitsippat.
- 5) Kalaallit Nunaannut eqqussuineq pillugu maleruagassat qaqugukkulluunniit atuuttut.
- 6) Tunisassianik uumasunit pisunik nerisassanik pisortat nakkutilliinerisa aaqqissuunneqarnerat pillugu immikkut aalajangersakkat pillugit Kalaallit Nunaannut nalunaarummi piginnaatitsissutit uppersaatillu pillugit piumasaqaatit naammassineqarsimappata, tamanna attuumassuteqartillugu.

*Imm. 2.* Aalisakkanik nutaanik aalisariutiniit Kalaallit Nunaannut toqqaannartumik tulaassineq imm. 1, nr. 2-mi piumasaqaatinut ilaanngilaq.

*Imm. 3.* Tunisassianik allanik imm. 1-imut ilaanngitsunik eqqussuineq taamaallaat pisinnaavoq Fødevarestyrelsi siumoortumik akuersissuteqareerpat.

## Kapitali 10

### *Avammut niuerneq*

**§ 28.** Inuussutissanut avammut niuerutigineqartunut imaluunniit avammut niuerutigineqartut atatillugu §§ 29 aamma 30 naapertorlugit piumasaqaatit attuumassuteqartut §§ 5, 7, 8, 17 aamma 19-imi allatorneqarsimapput.

**§ 29.** Inuussutissat nunamut niueqatigisamut avammut niuerutigineqartussat aamma tassani nittarsaanneqartussat aalajangerneqarsimasut, inuussutissat pillugit inatsisini piumasaqaatinik attuumassuteqartunik eqqortitsissapput.

*Imm. 2.* Inuussutissat uumasunit pisut nunamut niueqatigisamut taamaallaat avammut niuerutigineqarsinnaapput, suliffeqarfinnit allattuiffimmut EU-mit suliarineqartumut nutarterneqartartumullu allanneqarsimasunit nassiunneqarpata tassanilu sananeqarsimallutik imaluunniit suliarineqarsimallutik.

*Imm. 3.* Nunamut niueqatigisamut avammut niuernermi tunisassianik uumasunit pisunik nassiussat piginnaatitsissutinik uppernarsaatinilluunniit allanik ingiaqateqartinnissaat suliffeqarfiit inuussutissalerisut isumagissavaat.

*Imm. 4.* Aalisakkat nioqqtissat uillullu uumasut il.il., aalisakkanik tunisassianik uillunillu uumasunik il.il. eqqussinermi uumasut nakorsaannit nakkutilliineq pillugu Kalaallit Nunaannut nalunaarummi nassuiarneqartutut ittut, imm. 2 aamma 3 apeqqutaatinnagit nalunaarut taanna naapertorlugu niueqatigiissutigineqarsinnaapput.

*Imm. 5.* Suliffeqarfiit tunisassianik inuussutissanik assigiissagaanngitsunik tunisassiorlut nunamut niueqatigisamut taamaallaat niuersinnaapput Fødevarestyrelsimi siumoortumik akuersissuteqareerpat.

**§ 30.** Inuussutissat, nunami niueqatiginngisami nittarsaanneqarnissaat siunertaralugu Kalaallit Nunaanniit avammut niuerutigineqartut imaluunniit avammut niuerutigineqaqqittut, nunami apuuffissami oqartussanit piginnaatitaasunit allanik aalajangiisoqanngippat, imaluunniit inatsisini, najoqqutani, malittarisassani, suleriaatsimi imaluunniit inatsisini allani aamma allaffissornikkut suleriaatsini, nunami apuuffiusumi atuuttuni allamik aalajangersaasoqarsimanngippat, inuussutissat pillugit inatsisini piumasaqaatit attuumassuteqartut eqqortissavaat.

*Imm. 2.* Inuussutissat peqqissutsimut ajoqutaanerat eqqaassanngikkaanni, pisuni allani nunami apuuffissami oqartussat piginnaatitaasut inuussutissat pineqartut nunami niueqatigisami imaluunniit Kalaallit Nunaanni nittarsaanneqarsinnaannginnerannut pissutaasut pissutsillu pillugit tamakkiissumik ilisimatinneqarnermik kingorna, tamanna erseqqivissumik akuersissutigereerpassuk aatsaat inuussutissat avammut niuerutigineqarsinnaapput imaluunniit niuerutigineqaqqissinnaallutik.

*Imm. 3.* Kalaallit Nunaata nunallu apuuffissap akornanni illuatungeriilluni isumaqatigiissutit atorineqartillugit, inuussutissat Kalaallit Nunaanniit nunamut apuuffissamut avammut niuerutigineqartut aalajangersakkat taakku eqqortissavaat.

*Imm. 4.* Nunami apuuffissami oqartussat piginnaatitaasut tamanna piumasarissappassuk, tunisassiat uumasunit pisut piginnaatitsissutinik uppernarsaatinilluunniit allanik ingiaqateqartinnissaat suliffeqarfiit inuussutissalerisut isumagissavaat.

## Kapitali 11

### *Utertitsineq*

**§ 31.** Inuussutissanik uumasunik pisunik utertitsinissamik akuerineqarnissaq pillugu qinnuteqaat Fødevarestyrelsimut nassiunneqassaaq.

*Imm. 2.* Imm. 1 malillugu akuersissut makku tunuliaqutaralugit tunniunneqarsinnaavoq:

- 1) nunani inuussutissap assartorneqarfiani imaluunniit quersuarmitinneqarfiani pissutsinik uumasut peqqissusaannut tuanngasunik naliliineq, aamma
- 2) avammut niuernissamut piginnaatitsissut, tassaasinnaasoq

- a) avammut niuernissamut uppersarsaatip allagartaa assilisaanngitsoq imaluunniit uppersarsaatit allat inuussutissat Kalalalit Nunaannit anninneqarneranni aallaqqaammut ingiaqataatinneqartut,
- b) nunami isumaqatigiisummut ilaanngitsumi oqartussat tamatumunnga uppersarsaataata assilineri, imaluunniit
- c) inuussutissalerinermi immikkoortup atsiortuusup tamatumunnga uppersarsaataata assilineri.

*Imm. 3.* Aalisakkanik nioqutissianik, uillunik uumasunik il.il. utertitsineq pissaaq aalisakkanik tunisassianik uillunillu uumasunik il.il. eqqussinermi uumasut nakorsaaniit nakkutilliineq pillugu Kalaallit Nunaannut nalunaarut naapertorlugu.

## **Immikkoortoq IV**

### **Pineqaatissiinerit atuutilersitsinerlu pillugit aalajangersakkat**

#### Kapitali 12

##### *Pineqaatissiinerit pillugit aalajangersakkat*

#### **§ 32.** Akiliisitaanermik eqqartuussaassaaq

- 1) § 5-imik, § 7, imm. 1-3-imik, § 9-mik, § 10, imm. 1 aamma 4-mik, § 11, imm. 1-2-mik, §§ 12-14-mik, § 17-mik, § 18, imm. 1-imik, § 19, imm. 1 aamma 5-imik, § 20-mik, 21, imm. 2-mik, §§ 22-25-mik, § 26-mik, § 27, imm. 1 aamma 3-mik, §§ 29-30-mik imaluunniit § 31, imm. 1-imik unioqutitsisoq.
- 2) § 16 malillugu piumasqaatinik aalajangersarneqartunik saneqquttsisoq, imaluunniit
- 3) Ilanngussaq 1-13-imi aalajangersakkanik eqqortitsinngitsoq.

*Imm. 2.* Ingerlatseqatigiiffiit il.il. (inatsisitigut pisinnaatitaasut pisussaataasullu) unioqutitsisuuppata, ingerlatseqatigiiffik akiliisitaanermut akisussaatinneqarsinnaavoq.

#### *Atuutilersitsineq*

#### **§ 33.** Nalunaarut ulloq 26. april 2014-imi atuutilersinneqarpoq.

*Imm. 2.* Suliffeqarfiit inuussutissalerisut pillugit Kalaallit Nunaannut nalunaarut nr. 655, 19. juni 2006-imeersoq peqatigisaanik atorunnaarsinneqarpoq

*Fødevarestyrelsi, ulloq 24. april 2014*

HANNE LARSEN

/ Kristina Skov Olsen